



UPA 2026/141

6/5-2026

Napaartoq Isak Petrussen

**Immap naqqani aatsitassarsiortoqannginnissaa siunertaralugu Naalakkersuisut inatsisilioqullugit
Inatsisartut aalajangiiffigisassaattut siunnersuut.**

(Inatsisartunut ilaasortaq, Pipaluk Lynge, Inuit Ataqtigiit)

(Siullermeerneeqarnera)

Qujanaq Inatsisartunut ilaasortaq Pipaluk Lynge siunnersuummut.

Immap naqqani aatsitassarsiorneq qulequtaavoq, ilungersuunneqartariaqartoq. Imartatta avatangiisaanut, piniarnitsinnut aalisarnitsinnullu tunngassuteqarpoq, siunissami kingulissatsinnut aammalu nunatsinnut isertitassaasinnaasunut periarfissatsinnut tunngassuteqarluni.

Demokraatinit aallaavigineqartoq ersarippoq. Imartarput eriaqissavarput. Imartarput imaanngilaq nunap assigani takussaaginnartuusoq imaluunniit aatsitassarsiorfigisinnaasaq. Imartarput inuuniarnitsinnut tunngaviuvoq, kulturitsinnut, kinaassutsitsinnut aammalu aningaasarsionitsinnut pingaaruteqarluinnarpoq. Taamaattumik siunnersuummi isumakuluuteqarneq paasisinnaalluarparput. Isumaqaatigaarput, nunarput suliniutinut imartatsinnut, piniakkatsinnut, aalisagaatitsinnut inuussutissatsinnullu kingunerluutaasinnaasunik naammattunik paasisimangisatsinnik aallartitsissanngitsoq kissaatigineqarmat.

Kisiannili apeqqutip taama ilungersunartiginera pissutigerpiarlugu, Demokraatit isumaqanngillat, toqqaannartumik inerteqquteqassasugut ilisimasat pisariaqartut pigitinnagit. Annilaanganeq kisiat aallaavigalugu imaluunniit aningaasatigut neriulluernerit kisiisa aallaavigalugit iliuuseqassanngilagut. Ilisimasalli aallaavigissavagut.

Nunarput ineriartortitsinissamik pisariaqartitsivoq. Isertitat suliffissallu aammalu aningaasaqarnermut toqqammavioq patajaannerusoq pisariaqartippagut, inuunerissaarnissaq, peqqinneq, ilinniartitaaneq aammalu toqqassisimaneq siunissami qulakkiissagutsigu. Aatsitassarsiorneq ineriartortitsinermut tassunga akuusinnaavoq. Pinngortitarsuarli, imartarput imaluunniit inuussutissarsiutitta pingaarnersaannik innarliinissaq akigineqassanngillat. Taamaattumik oqimaaqatigiisitsineq pingaartuuvoq.

Taamaattumik isumaqarpugut, sukumiisumik attuumassuteqanngitsunit misissuineramik suliamut immap naqqani aatsitassarsiorsinnaanerup kingunerisinnaasai misissorlugit aallartinneqartariaqartut. Misissuinermi taamaattumi avatangiisinut sunniutai isiginiarneqartariaqarput, inuussutissatsinnut sunniutigisinnaasai, aalisarnermut piniarnermullu sunniutigisinnaasai, nunani tamalaani misilittakkat, killilersuisinnaanerit aammalu inuiaqtigiit aningaasaqarnerannut kingunerisinnaasai. Demokraatit kissaatigaat, suliaq taanna suliamut attuumassuteqanngitsunit suliarineqassasoq.



Demokraatit immap naqqani suna tamaat akigalugu aatsitassarsiornissaq kissaatiginngilaat. Aammali kissaatiginngilarput tunngavilersorluangaanngitsumik inerteqquteqarnissaq.

Taamaattumik una allannguutitut siunnersuutigaarput:

Inerteqquteqannginnermi immap naqqani aatsitassarsiortoqarsinnaaneranut sukumiisumik suliamullu attuumassuteqanngitsunit avatangiisinut, inuussutissarsiornermut aammalu inuiaqatigiit aningaasarsiornerrannut kingunerisinnaasaanik misissuinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Taamatut oqaaseqaateqarluta Demokraatinit allannguutissatut siunnersuut akuereqqullugu innersuussutigaarput aammalu siuliani siunnersuutaasup Inuussutissarsiornermut- aamma Aatsitassarsiornermut ataatsimiititaliami suliarineqarnissaa innersuussutigalugu, qilanaaralugu oqallisissiap pingaaruteqartup isiginninerit assigiinngitsut tamaasa isummersorfiginissaat.